

Aruba

Prome Minister Eman na develo Caya Bernadina Growell:

“DANKI NA NOS CREADOR Y E FAMILIA PA A PRESTA BERNADINA GROWELL NA PAIS ARUBA”

ORANJESTAD - E berdad di e palabranan expresa pa Prome Minister Mike Eman na momento di develo di Caya Bernadina Growell diasabra ultimo, a keda proba cu e presencia di politiconan di diferente ideologia.

E mandatario den su discurso a señala cu sin importa color politico, tur hende a stima Bernadina Growell. Y a bisa cu e proposicion pa nombra e caya na nomber di Bernadina a bin di un Gobierno y a wordo ehecuta dor di un otro Gobierno.

E tabata un momento masha emocionante specialmente p’e rumannan di Mama di Cultura Bernadina Growell, ora cu e saco di koes poni riba e plachi cu e nomber di e caya, net dilanti di loke tabata cas di Mama di Cultura, a wordo kita den presencia di famia, comision y representantenan di

Gobierno. Por a mira lagrimanan ta cay for di wowo di principalmente e rumannan, cu a keda masha hopi emociona cu e honor cu a wordo rindi na nan ruman muher. Na final e ruman muher, Irena Kock no por a wanta su emocion, y a duna Prome Minister Eman un brasa fuerte di gradicimento.

Presidente di Comision Bernadina Growell, drs. Mervin Wyatt-Ras a expresa gradicimento grandi cu presencia di varios Parlamentario y tambe Prome Minister Mike Eman y Minister di Cultura Michelle Winklaar.

Compañia pa bailenan folklórico y presentacion di cancionnan di Bernadina, e ceremonia a cuminsa rond di 4’or di atardi cu palabranan di gradicimento di Mervin Wyatt Ras.

Den su discurso el a ilustra e importancia p’e herencia di Bernadina

Growell wordo pasa p’e generacion hoben y esnan di futuro. Den cuadro di e celebracion, despues di develo di Caya Bernadina Growell, a sigui un parada folklórico den cayanan di Brasil te na Centro di Bario Brasil, caminda e comision a organisa un bunita exposicion dedica completamente na Mama di Cultura, titula “Pilar di nos cultura”. Premier Eman a sigui pa describi Mama di Cultura di e siguiente manera: “Un personalidad cu a acapara e tononan cu ta resona den e fibranan di e Arubianonan cu na prome momento a ocupa e bida rib’e isla aki y a combina su musica cu e origen di nos cultura. Pesey ora un persona asina, cu asina hopi a simbolisa, tipifica y carga tur locual ta Aruba, bay laga nos, e ta laga un bashi hopi profundo.

Pero Bernadina ta manera el a premira cu e

tin un responsabilidad no solamente cu awe, pero cu mañan tambe. El a traha duro pa inculca e amor cu e tabatin pa Aruba den curason di tur hende rond di dje; el a inculca e talento, e pasion pa nos cultura, e pasion pa transmiti via di musica y arte e expresionnan di mas profundo cu ta biba den curason di cada Arubiano cu t’e stimacion p’e pida baranca aki.

Awe nos por mira na laira, cu nos Creador a dune e talento aki, y bisa nos Creador y su famianan, danki pa a presta Bernadina na pais Aruba. El a yuda construi locual awe tanto nos ta honra como pais Aruba. Un fuerte aplauso cu Bernadina por scuche eyriba y pa loke e pueblo di Brasil, y Aruba ta sinti pa Bernadina Growell,” y un biaha mas e publico a pone man hunto pa aplaudi.

Prome Minister Eman a sigui splica cu na momento cu Gobierno a wordo aserca cu e peticion pa ehecuta

un decision di un Gobierno anterior pa nombra e caya na nomber di Bernadina Growell, no tabatin duda den esaki.

“Esaki ta un di e tipo di decisionnan cu ta crusa tur frontera politico. El a wordo tuma dor di un Gobierno, e ta wordo ehecuta dor di un otro Gobierno. Nos tur, cual color cu nos por tin, ta stima locual Bernadina Growell a haci pa e pais aki.

Laga e sentimento aki di union, pa transcende diferencianan, pa nos inspiracion di personalidadnan asina, cu por haci un diferencia grandi den calidad di bida y den e proposito cu nos tin riba e baranca aki. Danki na e famia un biaha mas.

Cu honor nos ta para aki awe pa duna merito y reconocimiento na tur locual nos Mama di Cultura Bernadina Growell Kock a representa na e pais aki,” Eman a bisa. Y a finalisa felicitando e pueblo di Brasil y Aruba en general cu e hecho aki.